



c 68





Don G

2153

SEIANVS

François.

AV ROY.

Case

F

39

326

THE NEWBERRY
LIBRARY

1615 matu

SEIANVS

FRANÇOIS.

Au Roy.

Les Rigueurs, Les Cruautez, Les Tyrannies, Les Meurdrés, Les Assassinsats, Les Empoisonnemens, Les Volleries, Les raptz, Les Sacrileges, Les Accusations, Les Proscriptions, Les Injustices, Les seditions, Les Partialitez, & les Guerres: Bref les Feux & les Flammes dont l'Empire Romain a esté embrasé sous le regne de Tibere, n'ont peu estre arrestées, suspendués, ny éteintes que par la mort de Seianus Iustitians fatal, le boutefeux & le flambeau des maïheurs qui ont presque réduit en cédre ceste premiere Souueraineté du monde.

SIR E,

Voicy l'Estat present des affaires de vostre Royaume, en voicy la viue Image. Il y a dix ans que SEIANVS a porté son Démon dans la France sous le regne du GRAND HENRY vostre pere. Il s'y est estably en Hipocrite, en

Regnardeau : & ce grand Prince qui cherissoit ses Princes, qui aymoit ses sujets, commençant à le cognoistre commençoit aussi à le hayr, & auoit resolu de purger les Estats, & en chasser ceste peste publique.

Mais la mort funeste & precipitée en ayât arresté l'execution ; vostre Minorité, les diuisions que SEIANVS a semées dans vostre Estat, & l'autorité qu'il s'y est vsurpée, luy ont mis la Couronne sur la teste : nous ont fait esclaves de ses desirs & de ses passions déreiglées, & l'y font regner en Lyon dévorant.

Nous ne vivons depuis cinq années que de larmes, surchargez de tant d'impositions extraordinaires, foutez de tant de nouvelles commissions, & d'Edicts de creation d'Offices, opprimez de tant de levées de deniers. Bref si tyrannisez par ce nouvel SEIANVS, qu'il ne nous reste plus de vie, non pas mesme le pouuoir & la liberté d'exhaler ces dernieres parolles.

Nos Princes sont empoisonnez, sont emprisonnez, sont chassez d'aupres de leur Prince, sont courus, on leur liure la guerre, on leur interdit l'entrée des villes, & veut-on faire croire que la requeste & l'instance qu'ils font de la reformation de l'Estat, que la Iustice qu'ils demandent à vostre Majesté de l'assassinat du feu Roy, des maluersations de SEIANVS & ses suppolts, est vn crime de leze Majesté.

Le Parlement, cét Auguste Senat de la Iu-

stice des Roys, ceste Cour des Pairs, la ferme Colonne de vostre Couronne, est menacée de mort, de prison perpetuelle ou d'exil si elle continuë en ses tres-humbles Remonstrances: les vieux & fidels seruiteurs n'ozeroient plus parler, il n'y a plus de liberté que pour les pensionnaires vos tres-humbles seruiteurs, vos fidels subjects sont enleuez de leurs maisons, de leurs lits, lors mesme qu'ils n'ont plus presque de vie, en extrémité de maladie, & conduits en triomphe par la ville de Paris, par vne insolente troupe d'Archers, sont arrachez d'entre les bras de leurs femmes, du corps du Parlement, & renfermez dans la prison d'Amboise.

La Noblesse qui se joint à ceste sainte & iuste demande, est declarée rebelle. On propose del'assassiner, ou la proscrire de la France. Le tiers Estat est menacé de bastonnades, des fers, des ceps, & de prison: la parole mesme est interdite aux gens de bien qui s'en pourroient plaindre, & mes-huy la France deuient vne forest sans Princes sans homes, sans François, si ce n'est que la Bastille, les prisons de Paris, & le Chasteau d'Amboise en demeurent peuplez.

Si ta cruauté, SEIANVS, n'est encores assouuie du sang & de l'honneur de ceux que tu as fait mourir & mal traicter pour auoir leur bien & confiscation. Si ton AVARICE n'est encores bornée des grands tresors que tu as vollez à sa Majesté & à son peuple, qui te font seigneur

de deux cens mil liures de rente en fonds de terre, & de plus d'un million d'or en deniers comptans. Si ton AMBITION démesurée n'a encores du tout eslongné nos Princes, & éteint la memoire de leur nom pour commander apres absolument en France, & y trancher du Souuerain. Si tu n'as du tout opprimé ou aboly la IUSTICE SOUVERAINE de nos Rois, qui se plaint de tes mauuais déportemens. Si le SCEAV, le CONSEIL de la Majesté & les FINANCES de cét Estat ne sont encores assez ruinées. Bref si le peuple qui reuere son Roy, si la Noblesse qui le soutient a encore quelque chose de reste qui puisse empescher l'effect de tes desirs.

Cruel Tyran, SEIANVS, nostre ennemy s'auance, fais nous tout a fait MORES, sans nous faire languir: Ne nous traînes plus en esclaves apres tes passions. Tranche toutes remises & aduance promptement le cours de nos malheureuses destinées, aussi bien nous sommes François, & voulōs ou la mort pour ne souffrir plus tes cruantez, ou la vie pour deffendre celle de nos Princes.

Grand Dieu moteur de cét vniuers, qui sondez les cœurs & les pensées des hommes, ayez pitié de ce pauvre Estat du tout perdu. SAUVEZ NOSTRE ROY, maintenez les Princes, & ce grand corps de Iustice, & nous donnez la force de tellement combattre l'ennemy des fleurs de Lys, que demeurans dans l'integrité de nos Pères, nous chassions SEIANVS &

la **TIRANNIE**. Nous faisons voir à la posterité que nous auons encore assez de courage & de force pour maintenir nostre Roy, les droits de la Couronne, & la Iustice, la deffendre de l'inuasion de ses ennemis, & empescher l'audace & l'insolence de tous ceux qui s'y voudront rendre contraires.

SIRE, les larmes de vostre pauvre peuple n'ayant peu estre veuës des tendres yeux de vostre Maiesté, ny leurs souspirs & voix mourantes, ouës de vos ieunes oreilles souuentefois paruenues iusques à vostre chambre, souuent représentées à vostre Conseil, tousiours mesprisées par **SEIANVS** qui y preside. Ce grand Roy des Roys les a en fin exaucées, & parmy ce grand **DESORDRE** au milieu de nos fers, dans l'abandon & la licence du vice, à la veille de nostre perte, a inspiré la volonté de **M. le PRINCE** de les vous faire cognoistre, & les vous représenter.

La lettre qu'il escriuit deslors à la Royne vostre mere, & la conuocation des Estats qui s'en est ensuiuy, tesmoigne assez si la plainte est iuste & la reformation necessaire. Car qui vid jamais Maiesté si mal seruie? les Princes & Grands si peu respectez? la Iustice si mal administrée? vos Finances si ruynées? la Noblesse si fort mesprisée? le peuple si opprimé? les charges & dignitez si mal départies? les benefices si mal pourueus? les offices à si hault pris? & la Couronne en si grand hazard?

Mais, **SIRE**, ceste belle esperance que

nous auions conceüe s'est éuanoüye, l'assurance que nous auions prise de quelque reformation est demeurée vaine, & ne nous en reste que le seul désespoir.

Le Clergé qui est l'Ordre le plus S. & sacré, COVRÉ, a PLESCHI, sous l'assurance de continuer ses desbauches, s'est mesme roidy contre vostre auctorité, & a trouué bon qu'on meist la sacrée personne des Roys à l'abandon, & à la mercy des assassins, dès aussi tost qu'on leur a eu assuré leursdits benefices en faueur de leurs coadjuteurs.

La Noblesse en partie a esté gaignée par PRESENS, par PROMESSES, par BREVETS de pensions ou gouuernemens de places ou ambassades.

Le tiers Estat qui seul restoit ferme & fidele, a esté intimidé, a esté menacé, & l'industrie de SEIANVS a esté si forte, qu'il a fait employer dás leurs Cahiers nō ce qui étoit de leur charge, proposé & resolu en l'Assemblée; mais ce qu'il a trouué bon, ce qu'il a voulu, & le pis est, qu'ayant fait congédier partie des Députés des Prouinces, aüec assurance de pouruoir à leurs maux, on est encore sur l'attente de ce remede: On s'est enyn mot moqué d'eux. Car deffors les charges sur le tel ont esté augmentées, nouuelles impositions establies, commissions, & vingt's Edicts de creation d'Offices expédiées, la Paulette continuée, la chambre de Iustice mesprisée. Bref la parole du Roy si solemnellement donnée & iurée en plain

plain Conseil est violée, d'où sont naiz les maux, les seditions, les souleuements & les meurtres qui ont esté faits depuis peu en diuers endroits du Royaume.

Themistocles voulant leuer par force la cruë des tailles sur les Adrians, leur fit entendre qu'il leur apportoit deux puissants Dieux *Amour & Force*: mais ils luy respondirent qu'ils en auoient encores deux plus puissants, *scavoir Pauvreté & Impossibilité*.

Hé! qui ne s'est point plaint de ces charges? V. M. l'a veu par la declaration que la Noblesse en a faite au Chancelier, imprimée & portée, nō par deux ou trois de ce corps, mais par deux cens qui ont protesté de la soustenir à la pointe de leur espee, attendant que V. M. leur en ait fait iustice.

Le Tiers Estat s'en est scandalizé, & s'estant veu seul mal traicté pour auoir bien seruy: soustenu les droicts de vostre Couronne, la liberté & seureté de vostre Personne, vous a déclaré qu'il ne pouuoit plus supporter le *Fait* & si dures & pesantes charges qu'impuissamment & impatiemment: & les Deputez de cet Ordre vous ont assez tesmoigné & aduertty qu'ils ne pouuoient retourner chez eux en assurance de leurs personnes, si V. M. ne les contenoit de ce qu'il leur a esté promis, & dont lettres ont esté escrites & enuoyees aux Prouinces.

Mais tout cela n'a seruy d'aucune chose sur l'inhumanité de *Sejanus*, sur les mauuais des-

seins : Vostre Parlement en fin a pris pitié du malheur de la France , & continuant à l'endroit de V. M. la fidelité & deuotion dont il a esté de tout temps admiré , auoit ouuert la porte au remede; & par son Arrest du 28. Mars (*Qui porte* semonce aux Princes & Grands du Royanme de se rendre au Palais) esperant de seruir V. M. si puissamment , si vtilement , & avec tant de gloire , que vostre Regne en eut esté beny de Dieu & des hommes : Et estoit ceste action si glorieuse & si grande , qu'il en eut esté memoire à jamais.

A cela vos mauuais Conseillers , les mauuais François opposent que c'est entreprendre sur vostre autorité; Que le Parlement ne doit cognoistre des affaires d'Estat , Côme si c'estoit chose nouuelle , & dont on fut sans exemple dans l'Histoire; que le Parlement representat à son Roy ce qui regarde le bien de ses affaires, & les desordres de son Conseil: comme si en l'année 97. ce mesme Senat n'auoit pas fait le semblable à l'endroit du feu Roy vostre Pere estant lors à Fontainebleau, *l'Achilles* François, le baston de Iustice le sieur de Harlay , parlant , accompagné de bon nombre de Cōseillers de ladite Cour: Comme si vous ne luy auiez pas ordonné lors que la Roine fut faite Regente dās les Augustins: Comme en fin , si vous ne luy auiez pas tout fraichement commandé, pour faire declarer Monsieur le Prince criminel de leze Majesté.

On met la Roine en ceruelle , on ne veut

point que cette assemblée se face, & dés lors *Sejanus* qui veoit les actions delcouvertes, la vie cogneuë de tout le monde; qu'on trouue des promesses faites pour luy à la charge d'*expedier & faire des Arrests du Conseil*, Que son honneur est perdu, & que son bien & la vie courent risque, d'estourne l'effet d'un si aduantageux & honorable dessein, donne l'alarme bien chaude, & fait sonner le toxin cōtre vn corps de Iustice fidele & tres-obeyssant.

Ce Parlement est mandé, on veut veoir ses Remonstrances: elles vous sont presentees, elles vous sont leuës en plein Conseil: Mais la Responce n'est que menaces, la satisfaction que mespris, & le bon gré de ce seruice que deffences de passer plus outre.

On fait plus, car *Sejanus* declame contre ce Senat: *Bullion & Dollé* publiquement opinent à la mort de quelques vns des Presidens & Conseillers de ce corps. On les menace en vostre presence, & des lors l'on minute des Arrests fulmineux, pleins de passion, de violence & de rage. On nomme les Remonstrances caolmnies, le zeile du Parlement *Entreprinse* sur vostre authorité: leur deuoir & le bien del Estat crime de leze Maiesté, avec des parolles pleines d'ignorance, & de peu de verité.

On veut aussi tost armer Paris pour se saisir de la personne de Monseigneur le Prince. On fait aduancer les compagnies d'Ordonnance & les cheuaux Legers, pour inuestir S. Maur

des Fossees. On le suit à Creil, à Clermont, à Coucy, pour le prendre: & la peau du Lyon ne pouuant aucune chose, on y coust celle du Regnard. Car sous pretexte d'amitié & de reconciliation, On enuoye M. de Villeroy pour conferer avec luy, & pourueoir à ce désordre, & en chercher le remede. Mais tandis qu'on l'amuse sur ce traité, le sieur Philipeaux Pont Chattrain, est despesché avec charge secrette, du tout contraire, & par sa creance, & par ses discours a rompu vne si belle conference, qui promettoit tout bien à l'Estat, & offencé mondit Seigneur le Prince, & ledit sieur de Villeroy.

Vn certain Empereur fit venir à Rome *Archelaus*, sous feinte d'amité, l'accusa, l'arresta, & le fit mettre en prison, le fit mourir, & rendit son Royaume Tributaire à l'Empire Romain.

Et qui ne void que *seianus* qui aymela confusion & le désordre, iugeant que ceste conference estoit le seul acheminement des affaires, & que l'escheët en tomboit sur sa teste, la voulu rompre, rendre inutile, & la conduicte honteuse audit sieur de Villeroy? Et qui ne sçait son ancre sacrée? & que son refuge & son salut a esté de recourir à mōsieur d'Espernon, & le coniurer par les dignes & signalez serui-ces que chacun sçait, de ne l'abandoner point en occasion si importante & si necessaire? & persuader la Roïne de rompre ce pourpalé, & mettre ledict sieur de Villeroy en defiance

pres d'elle.

César craignant de rendre compte des charges qu'il auoit eues, s'empara de l'Estat, & se fit Souuerain; & Pericles jettâ le peuple d'*Athenes* à la guerre pour le mesme sujet. Ainsi fait *Seianus* lors que l'on parle de la recherche de sa vie, il arme tout l'Estat, & veut la guerre.

Ce pendant on joue des mains dans *Amyens*, les soldats de la Citadelle en esgorgeant les pauvres habitans, *Conchine* fait assassiner le sieur de Prouille sergent Major de la ville: aposte ses mousquetaires pour tirer sur monsieur de Longueuille & l'assassiner: chafse ce braue Prince de son gouvernement, en prend la place main armée, & se jecte en lieu de seurété, désarme la ville, & auctorise Mignieux pour couper la gorge anx domestiques de Prince.

Car il a bien considéré que le Gouvernemēt de Paris dont il offroit quarāte mil escus, Que la place de Gouverneur de Monseigneur vostre frere qu'il vouloit auoir du sieur de Breue, Que le bois de Vincennes, ny le Chasteau d'Amboise n'estoient assez forts pour asseurer sa vie contre la hayne generale & publique que la France a conceuë contre luy. Car de penser qu'un Tyran se puisse garantir par force, c'est vn abus, telmoins les Empereurs Romains, qui ne laisserent d'estre assassinez, encores qu'ils eussent quatre Legions d'ordinaire près leurs personnes, seul soin qui trauaille *Seianus*, pour estre maintenu.

Vostre Majesté a veu par la lettre de Monseigneur le Prince & par sa déclaratiō, la tres-humble submission de l'obeyssance qu'il a portée à ce qui est de vos Commandemens. Il ne dispute point vostre Mariage : il ne vous demande ny argent ny honneur, ny dignitez, ny recompense, ny places fortes, ny aucune choses pour son particulier; comme les ennemis publient, & que l'on a fait escrire au Parlement & par toute la France sous le nom de vostre Majesté. Son vnique but est vostre seruice, & toute son affection le bien de vostre Estat. Il ne crie que iustice, & la vous demande tres-humblement, contre le Marquis d'Ancre & sa femme, contre le Chancelier, & le Cheualier de Syllery son frere, contre Bullion & Dollé, vous demande encore iustice de l'assassinat de Prouille, la resolution des Cahiers des Estats Generaux, & le soulagement des oppressions que le peuple souffre; & nous adjouſtons à ces iustes & saintes demandes *Iustice* del'execrable assassinat commis en la personne du feu Roy, dont le sang crie vengeance. Où sont donc les intherests particuliers dont est parlé par ses lettres? Où sont les crimes dont on veut noircir la fidelité de Mōseigneur le Prince, & des Princes & Ducs qui l'assistent.

Et pour cela, faut-il que *Seianus* vous porte à la guerre? qu'il embraze les quatre coings de vostre Royaume, & qu'il le mette en cendre? Faut-il, SIRE, que pour six personnes vn

monde d'ames perisse, vos Villes se ruynent,
& la France deuiet vne forest? Quoy! pour
cela faudra il exterminer la maison de Fran-
ce, & sous des calónies de *Seianus* auctorisées
de vostre Sceau, & d'un Arrest falsifié par des
pensionnaires, perdre vostre sang & vos sujets?

Quoy! parce que Monseigneur le Prince
veut le seruice de vostre Majesté, Que Mon-
sieur de Longueuille ne se laisse point assassi-
ner & s'en plaint, Que monsieur de Mayen-
ne se contient en respect & en l'obeyllance
dans vostre seruice, & que mōsieur de Bouil-
lon ne veut liurer *Sedan* à la rage Espagnolle
& Italienne, on les veut declarer criminels de
leze Majesté? & pour ce on peu falsifier les
Arrests & les resolutions du premier Senat de
l'Europe, les faire imprimer & publier à sçon
de Trompe?

Monseigneur le Prince au nom de toute la
France, au nom de toute l'Europe, de tous
vos amys & alliez, vous demande Iustice.
Voyons si vous la luy pouuez refuser? & si pour
des personnes de neant il faut rejeter la voix
de Dieu; puisque celle du peuple est ainsi
nommée?

Vostre office de Roy, la qualité de Premier
Prince de vostre Sang & tres-humble sujet,
l'atrocité des Crimes, & le sacré Sang de vo-
stre Pere vous y obligent.

Les Rois, Sire, ont esté instituez & esta-
blis à ceste fin: Car laisser la Terre à la discre-
tion des hommes, viure sans Iustice, c'est à di-

re sans société, est chose du tout impossible; d'où est venu que les hommes mesmes se sont ordonnez des loix, si nous croyōs nos liures, Et les saintes Lettres nous apprennent que les Rois ont esté faits de la main de Dieu pour regir les peuples. Aussi leur Office n'est autre que de faire iugement & Iustice, dit S. Hierosme, & deliurer de la main des *Calumniateurs*, ceux qui sont opprimez par la force & puissance.

Iesuis, dit vn grand Prince, celuy d'entre tous les mortels, qui a esté agreable & esleu, pour représenter les Dieux en terre, Arbitre de la vie & de la mort du peuple, & distributeur de la fortune d'un chacun.

Considerez & meditez ces paroles, SIRE, & vous verrez à quoy vous estes obligé. Le Prince, dit *Senecque*, doit prendre vn soing entier de la chose publicque, se charger des bones & mauuaisés fortunes du peuple, s'oublier soy-mesme, pour l'amour de ses subjects, estre importuné de diuers messagers, Respondre à tous, auoir l'œil sur tant de villes, de nations & propinçes, & trauailler iour & nuict pour le salut de tous: *Qu'est-ce à dire sinon que la charge du Prince, & son bur ne doit estre autre que le salut du peuple? c'est à dire faire iustice.*

Oyez & prenez ce que disoit Tybere au Senat de Rome, & vous iugerez avec quelle conscience on vous persuade de baffoier les Parlemens. Je vous ay dit plusieurs fois; disoit ce Prince,

Prince, & le vous dis encore, que tout bon & iuste Prince doit seruir au Senat, à tous les Citoyens, le plus souuent & tousiours, à chacun d'eux en particulier, & ne me repents point de l'auoir dit ainsi. Belles paroles dignes d'un grand Monarque, & qui ne peuuent estre prononcées que par un Esprit vrayement Diuin. Voila l'entree instruction d'un Prince: qu'il serue (dit-il) c'est à dire qu'il écoute, qu'il defere au Senat, qu'il croye les bons & fidels Conseillers, qu'il cherche & procure le bien du peuple, & qu'à chacun il fasse Iustice; & empesche les oppressions: Hors de là il n'y a point de Prince.

Ce que Trajan considerant lors qu'il donnoit au Preteur l'Epée de Iustice, avec pouuoir de vie & de mort: *Tenez*, (luy disoit-il) si ie cōmande quelque chose avec Iustice pour le salut de tous, employez-la pour moy, si autrement, vsez en contre moy.

Representez vous que les Roys ne sont que depositaires de Corōne: & de fait, *Adriā* l'Em. auoit coustume de dire qu'il se porteroit à la direction de la chose publique, comme si l'affaire du peuple estoit la sienne propre.

Ceste vieille eut bonne grace, qui demandant Iustice à ce mesme Empereur, apres plusieurs remises, l'arresta tout court un iour qu'il alloit à la chasse, & eut la hardiessse de luy dire: *Rendez Iustice, ou ne soyez plus Roy.* Mais quels inconueniens de malheurs n'ont ils point suiuy; les Princes qui ont desnié la Iu-

stice à leurs peuples ? *Philippes* pere d'*Alexandre*, & *Demetrius* Poliocertes, en ont laissé des beaux exemples à la posterité. Au contraire, les Royaumes qui ont esté regis par Iustice ont tousiours esté florissans, & les Roys heureux qui l'ont maintenuë.

Laiſſons les *Philippes*, les *Césars*, les *Traians*, & tous ces vieux Romains : Iectons les yeux sur la Iustice de l'Empereur de Bisance; Voyons Totilla ce fleau de Dieu, de qui les actes de Iustice sont si remarquables qu'ils seroient rougir de honte les Chrestiens.

Mais nos Roys de France, Charles VIII. & S. Loys & ses descendans nous en fourniroient des plus frais & des plus rares, si nous dessein estoit d'en faire vn ramas: il nous suffit de vous dire que ce Royaume n'a esté soustenu de ceste presente main de Dieu sous le regne mesme du feu Roy vostre pere, que par les actes de sa Iustice.

Vous, SIRE, particulierement estes obligé à ceste mesme Iustice : & quand il n'y auroit autre obligation que le serment de vostre Sacre, c'est chose si importante à vostre salut & de vostre peuple, que vostre Majesté ne s'en pourra iamais dédire, non pas mesme le differer ou conjurer, sans vne apprehension perpetuelle de la main du Tout-puissant.

A l'égard des Hommes ; desquels vous ne releuez en aucune façon, encores y estes vous obligé, si les paroles des Roys sont veritables & pleines d'effect, particulieremēt à l'endroit

de Monseigneur le Prince : Car sur les plainctes qu'il vous fit par sa lettre du mois de Feurier 614. des maluerfations de *Seianus* & ses adherans, Voicy les mots de la responce que la Royne vostre Mere luy escriuit, En tout cas (dit-elle, mon Neveu) les fautes sont personnelles : Si aucun d'eux ; parlant des dessusdits, s'est tant oublié que de manquer au deuoir de sa charge, l'entends plustost le condamner que l'excuser.

Parolles dignes, certes, d'une grande Princesse, & d'une Royne de France : mais l'exécution en seroit bien plus glorieuse si elle en eust esté faite, ou si elle l'estoit à present : Car qui doute que ce Tyran n'ait abusé du pouuoir de sa charge ? n'ait ruyné ce Royaume, & l'ait perdu de reputation par ses cōcussions, volleries, & trahisons ? En pouuons nous douter apres la dénonciation & declaration de M. le Prince, qui a offert de le vous iustifier ? & que le Parlement de Paris demande permission d'y pouruoir ? Voudriez-vous enfin refuser la Iustice que vous auez promise, iurée, & que vous leur devez ? Quoy ! faudra-il que nous facions venir en France vne vieille Estrangere pour vous dire, Faites Iustice, ou cessez de regner.

Encor la Royne vostre mere peu instruite des desordres & de leur auteur, a raison de se plaindre audit Seigneur Prince de ne l'en auoir aduertie : Car elle luy en eut fait raison comme elle luy promettoit. Mais que faites

vous à present que vous le sçavez, & que vous les cognoissiez? Laisseriez-vous sa parole engagée sans executer ou paracheuer vne œuvre si sainte & si salutaire? Mesme estant majeur, estant Roy, & pounant parler en Roy.

Voicy les mots de sa lettre, Je me veux plaindre à vous (dit la Royne) de vous estre déré de vostre creance & puissance enuers moy, & de mou affection enuers vous, d'auoir laissé passer si long temps de ma Regence sans m'auoir aduertie de leurs déportemēs si les auez recogneus prejudiciables au public: I'y eusse pourueu par vostre bon aduis, & me promets tāt de la reuerence qu'ils portent à mes volōtez & à vostre personne, Que pour nous cōplaire, se décharger du fardeau qu'ils supportent, & contenter le public, ils auroient eux mesmes remis leurs charges à ma disposition au premier signe qu'ils en eussent receu de moy, comme ils m'ont particulièrement & publiquement déclaré sur vostre plainte, & qu'ils sont encores prests de faire à la premiere semonce qu'il leur en sera faite de ma part.

Ces personnes si saintes & si obeïssantes, SIRE, que la Royne excuse par sa lettre, Je dits ces cinq Tyranneaux, auront ils changé d'humeur à presenr? Il n'est pas possible ny croyable qu'ils vueillent contredire ce qu'ils vous ont offert: Et puis qu'ils se veulent submettre à l'examen de la Iustice, Qu'ils déclarent en particulier & en public vouloir con-

tenter la France, & se démettre de leurs charges: Pourquoy ferez vous la guerre à Monsieur le Prince? Pourquoy exposerez vous vostre Royaume en proye, & le ferez denorer par le feu d'une guerre intestine?

Guerre qui affoiblit vostre autorité, incommode vostre personne, ruine l'Estat, dissipe vos sujets, & fait dépendre vostre Couronne de la discretion & de la mercy de vos voisins & de vos ennemis; Et tout cela pour maintenir ces pestes publiques.

Nous n'aons point encore oublié nos dernieres fureurs ciuilles, Nos campagnes ne sont point encore dégraissees des corps morts qu'elles ont couuertes; Nos riuieres, nos fleuves & nos fontaines rougissent encore du sang des François: Et voulez vous, SIRE, que pour six ou sept personnes qui ruinent vostre Majesté nous perissions tous? Détournez, détournez ceste malheureuse destinee de la France: Soyez Roy, & Roy des François.

Décérnez, SIRE, décérnez commission au Parlement pour informer contre ces Tyrans de vostre Estat: Ordonnez luy d'en faire Justice, & nous voila apres tous contans; Plus de guerre, plus de troubles: Il n'y a que les méchâs qui apprehendent la veüe de la Justice, & qui aiment la confusion: Car outre l'assurance qu'ils ont d'échaper par ce moyen le iugement des hommes, encor' ont-ils cet aduantage de pescher en eauë trouble. La vie d'un homme de bien doit estre semblable au

bastiment de *Iulius Drusus* : Si ces gens sont si iustes, & s'ils ont bien vécu, qu'aprehendent ils? Vne ame nette ne doit rien craindre.

Scipion l'Affricain l'honneur de son aage, *Scipion* Lasiatique, *Lutlius*, & *Ciceron* se sont iettez eux-mesmes dans les hazards de la censure: & pourquoy ces gens icy ne le souffriront-ils pas?

Mais, SIRE, voicy ce qu'ils touche, voicy le ver qui leur ronge l'ame, voicy en vn mot le bourreau qui suit *Seianus*: Car qui peut ignorer le train de sa vie? Qui les entreprises qu'il a faites en Suisse en sa premiere Ambassade, ayant ozé bailler des passeports aux ennemis de cet Estat qui courroient lors sur la vie & sur la Couronne du Roy Henry III. & apres du feu Roy vostre Pere? Qui ne sçait la lascheté qu'il fit à l'endroit des Suisses lors de son depart? Les deniers qu'il leur volla à la hôte & à la perte de la reputation & de l'honneur de la France, La trahison qu'il commit à la Royne, & ce qu'il a fait depuis son retour, ses pratiques mesmes, & les pensions qu'il tire tous les ans des Estrangers, La ligue que son fils a faite, du moins renouuелlee en Espagne, & les presens qu'il en a rapportez, avec lesquels il a tellement enflé les voilles de son ambition, qu'il medite desia la souueraineté du monde.

Bourg a esté démolycōtre l'aduis des Princes & principaux Officiers de la Couronne, La fidelité du sieur de Boësse offensée, Le sieur

de Requier chassé de Mets, & exposé à la rage de ses ennemis, L'amitié & la bonne affection d'Angleterre fort alteree, L'alliance des pais Bas, sinon du tout ruinee, du moins bien esbranlee, Celle de Venise mesprise, Le Duc de Sauoye abandonné, Les François qui l'ont assisté pendus & estranglez & taillez en pieces, Sedan mis en proye à l'Espagnol, Ceux de la Religion mal traictez, par tout opprimez, menacez & intimidez, sans qu'on daigne respondre les Cahiers, ny leur faire Iustice: Amiens, Peronne, Mōdidier, Roye, & autres places frontieres baillez à Cōchine: Marmoutiers, & Tours baillez à son beau-frere qui ne sçait presque lire ny escrire: Les Garnisons remplies d'Estrangers: L'ennemy de la France placé dās vostre Chambre; L'Ambassadeur d'Espagne en vostre Conseil, Dollé Intendant. Tout cela & vne infinité d'autres crimes que j'obmets, & qui serōt representez & iustificiez aillieurs: aillieurs a esté fait par l'aduis de & par l'autorité de *Seianus* & pour son proffit. Et qui pourra croire que ces dignes actions luy soient infructueuses, puis que ce sont autāt de crimes de leze Majesté, si les loix de la France meritent d'estre creuës.

Vos Tresors, ou plustost ceux de la Couronne sont vollez: Helas! HENRY III. mon Grand Prince, qu'estoit-il necessaire de fatiguer vostre vie, & suer si lōg temps pour rendre vostre France riche, opulente, & redoutable à tout le monde? puis que à present on l'a

fait esclauue de vos ennemis: Pauvre & du tout miserable? Tant de millions que vous auiez mis dans la Bastille sont évanouis, *Seianus* & Cōchine les possèdent, en achèptent des Principautez souveraines, des Marquisats, des Cōtez & des Baronnies, font bastir des superbes & Royales maisons: Partie de la Picardie, partie de la Normandie, tout le Domaine de Ponthoïse à vn autre Seigneur que Vous, les acquisitions s'en font sous noms supposez & confidens; le Greffier de la Grange baille tousiours ses contreroolles: Mais la possession en demeure à *Seianus*: Les Bancques de Lyon & de Venise ne sont fournies que des deniers qu'il vous a vollez: Les Academies de Paris ne s'entretiennent que des Billets & promesses du Tresorier de vostre Espargne, ou de feu Dargouges: Que Conchine ioué à trois dez Les cent mille pistolles ne coustēt que le maise à vn seul coup vn *Top Tiengo*, vn *Parolli* & *Reparolli*: L'argent de la Bastille est conuertty en vstancilles en cuisine, en broches, laichefrites, chainers d'argent, arronzouers de jardins, & employez pour la despēse & pour la garde des assassins du feu Roy vostre Pere: C'est le Conseil de *Seianus*, C'est l'aduis de Dollé & Bullion ses colporteurs.

Helas! quel compte pensez vous qu'ō vous rende de ces deniers que depuis peu on a eu leuez à l'acoustumee, *Seianus* vous employera de vieilles debtes qu'il acquiert au quart de ceux à qui elles sont deuës, & qui en poursuivent

uent le payement au Conseil, le rembourse-
ment de quelque vieille quittance d'offices,
dont la finance n'est entrée dans vos coffres.
Quelque mauuais debet de compte d'un par-
tilan. Disons plus, un infiny de despenſes imà-
ginaires & supposées, de faulſes quittances, de
roolles faux, de cōtans expediez à son profit,
& de la Marquiſe contre vos reglemens; les
dix-huict cens mil liures pour un coup ne luy
coustent rien, tout luy est permis, pourueu
qu'il tourne à son aduantage.

Il estoit bien permis à Péricles d'employer
dix mil escus en la despenſe de ſes comptes,
ſans acquit, mandemēt, ny en dire les cauſes:
parce que ſa prudence, ſa preud'hommeie, &
ſa loyauté estoit cogneue de la Republique:
Mais qui ne ſçait & cognoist l'auarice & la
deſloyauté de *Sejanus*.

Auſſi eſt-cela raiſon pourquoy la Chambre
des Comptes (fort prudement) n'a voulu
verifier l'acquit qui en auoit ſeellé, & qu'elle
a proteſté de ne le conſentir iamais, eſtāt tres-
veritable *que les deniers de la Courōne*, ceux-là par-
ticulieremēt ne pouuoient eſtre enleuez que
pour chaſſer l'ennemy du milieu du Royau-
me, s'il y estoit entré, ſuiuant l'arreſt qui en
fut faiēt au Conseil, les Princes & Ducs pre-
ſens peu apres l'aſſaſſinat du feu Roy voſtre
pere.

Mais de quoy ſert-il de faire de beaux Arreſts
en voſtre Cōſeil, puis que *Sejanus* les meſpriſe,
n'y a aucun eſgard, & paſſe par deſſus tout.

Cest Arrest est aboly par vn autre du tout contraire: la force & la violence peuuēt & ozent tout, les loix ny les hommes mesmes ne sçau-
roient faire resistance: la bastille est forcée, l'argent enleué par commandement de *Sejanus*: & pour auctoriser cest acte inouï, cōmis dans la ville de Paris, à la face du Parlement, on y fait trouuer vostre Majesté, & quelques Intendans & Financiers, Dollé & Bullion par tout.

On rompt les portes, les tonneaux, & les barricques du Tresor sont enleuées & conduictes chez la Marquise d'Ancre, dissipées & mangées auant estre distribuées. *Sire*, il n'est pas licite au Souuerain d'abuser des Tresors de l'Estat, d'autant que le Royaume (comme dict Cassiodore) n'est autre chose qu'une Re-
publique sous la garde du Souuerain: Et de fait Pericles fut griefuemēt repris de ce qu'il auoit dict aux Ambassadeurs des Alliez qu'ils n'auoient point d'intereſt à quoy les Finances fussent employées.

Si du moins on les auoit fait passer par l'Espargne, ce seroit quelque chose: Mais le sieur d'Arbaud ne les prend que sous son recepicé, & les renuoye à mesure que *Sejanus* ou le Marquis luy en escriuent, & que son rece-
pissé est deschargé, sans en vouloir compter.

Il y a fort long temps *SIRE*, que *Sejanus* meditoit l'execution de ceste souueraine entreprise. Ce n'est pas sans cause qu'il a chassé le *Duc de Sully* des Finances, & de l'arsenal, qu'il

luy a osté la Bastille, & la force de vostre canõ, pour le faire tomber és mains du Cheualier de Sillery son frere : Sully que le feu Roy vostre pere a tant aymé & chery, pour son merite, fidelité & capacité : Sully à qui vostre Majesté a obligation des Tresors qui estoient en reserve, du rachapt de tant de miliõs de domaine & rentes que vous deuiez, & de tant de millions dont vostre Couronne estoit engagée enuers les estrangers.

Ce n'est pas sans cause, encore vn coup, SIRE, si *Sejanus* entreprend sur vostre auctorité, & si les bons & vieux seruiteurs du feu Roy vostre Pere, qui ont le mieux faict, & qui iusques à present ont maintenu vostre Couronne, sont chassés ; les vns menacez de bastonnades, les autres mal traitez, & bannis de la Cour, & des affaires ; les faulces accusations, & les calomnies ne sont point encores esteinctes : Il se trouuera encore, ie m'assure, quelque nouuel *Mandiolla*, pour attaquer Monsieur le grand Escuyer, & Moisset, & faire bailleur leur confiscation à Conchine : quelque Iuif ou Marrane qui pourra entreprendre d'empoisonner nos Princes. On enuoye desia le biller aux Officiers souuerains, pour n'aller plus au Palais, sur peine de la vie : on les retiét prisonniers dans leurs hostels, sans ozer sortir : on les menace de coups de dagues ; le temps de Bussy le Clerc reuient : On veut loger le Parlement dans la Bastille : On a commencé à enleuer vn des Presidens, pour l'assassiner, ou

l'empoisonner, ou le confiner à Amboise :
Côme aussi on a exilé de vos meilleurs villes
plusieurs autres bons bourgeois & citoyens,
plus affectionnez à vo^re seruice, que ne fut
iamais ce coyon. Bon Dieu ! quel siecle est ce-
luy-cy, où les bons souffrent, & les meschans
sont portez.

Vostre Parlement en ses Remonstrances
vous a faict voir à l'œil, & toucher au doigt,
la dissipation de vos deniers, les volleries qui
ont esté commises ; & s'est offert de le vous
iustifier: Que faut il dauantage pour conuin-
cre *Sejanus*.

C'est ce grand corps de Iustice qui le vous
dict : c'est l'Oracle de verité qui le vous repre-
sente ; & pour cela on le menace : on luy def-
fend d'aller rendre Iustice : on arrache ses Of-
ficiers de leurs logis, pour les mettre au liét de
la mort.

Mais, SIRE, que dira *Sejanus* sur la ne-
cessité de vostre Espargne ? Comment est-ce
qu'il couurira les Emprunts qu'il fait faire ?
comment les intersts que vous payez, tandis
qu'il iouyt du principal de vostre reuenu ? On
nous menace, SIRE, d'un recullement des
rentes : on nous assure du retranchement des
gages des Officiers : on propose diuerses in-
uentions nouvelles, qui sont desia receuës en
vostre Conseil: vingt Edicts de nouvelle crea-
tion d'offices ont esté sceellez, prés d'estre en-
uoyez à vostre Parlement. Celuy des Procure-
urs est destiné pour la Marquise : les arres

& pots de vin en font desia baillez à *Sejanus*: le Commandeur de Sillery, & Barbin en minuent les Arrests: les Tresoriers des pensios ne suffisent point pour auoir les Comtez de Montbelliart, Alluys, & la Grange le Roy à l'autre: ils se veulent estêdre plus auant dans la France: il faut cent douze mil escus à *Sejanus*, pour auoir Fresnes: & qui s'en pourra estonner?

La loy Claudia deffendoit aux Senateurs Romains d'aubir aucun vaisseau de mer qui portast plus de quarante tonneaux, *Quastus*, dict Tite Liue, *patribus indecorus visus est*: Mais celan'a point delieu en Frâce, puis que le vice s'est changé en vertu, & qu'estre homme de bien, est deffendu sous le regne de *Sejanus*.

Et cependant en la necessité où vous estes, *Sejanus* ne void point que nous scauons que vos Fermes sont augmentées de plus du tiers, la despenſe de vostre Majesté diminuée de beaucoup, si ce n'est les pensions qu'il a renforcées en faueur de ceux qui trahissent leur ordre, & leur maistre, qui se sont departis de la recherche de sa vie, & de ses actions, qui les maintiennent & les portent en ses soupplées, à ses nouueaux Conseillers: Je dicts à ses confidents, ausquels il a faict augmenter la grace de huit mil escus par an, chacun, & qu'il faict gratifier iusques à cent sept mil liures de recompense en vne année: Au moins si vos pensions & dons estoient distribuez comme faisoient les Roys de Perse, & de Macedoine,

ou comme faisoit celuy d'Egypte vers Aratus, qui auoit l'Estat des Acheans à sa deuotion ; cela seroit supportable : Mais il les distribuë à ses confidens, & amys, & non à vos seruiteurs.

La passion, SIRE, ne me fait point parler ; ie n'ay aucun interest en ces affaires, mais la verité guide mes paroles : iamais Catilina, Marius, ny Sylla, dont l'histoire Romaine faict mention, ne furent si pernicleux à l'Empire, que *Sejanus* l'est à la France : le *Triumuirat* ne fit iamais tant de mal que *Sejanus* faict.

Tibere fut merueilleusement blâmé de ce qu'il ne fit aucune Iustice des plaintes qu'on faisoit cōtre les Vice-Consuls & Commissaires qu'il auoit estably és Prouinces au preiudice des Ordonnances de Rome & d'Auguste son predecesseur ; Et, dit l'Histoire, que ce fut vn des premiers traits qu'il fit d'un meschant Prince.

On vous pippe, ou vous ruïne, on vous trahit ; Et vous ne voyez pas que *Sejanus* vit dans la confusion comme le poisson d'as l'eau trouble : Que l'orage & la tempeste de l'Esté est son port asseuré ; Que la cōcorde & la paix est sa ruïne ; Les guerres Ciuilles ne son iamais villes qu'aux meschans, qui ne craignent pas moins la paix que la peste, ayans en tous euenemens deuant les yeux la resolution de *Catilina*, lequel disoit qu'il n'auoit peu par eau esteindre le feu pris en sa maison : mais qu'il l'esteindroit en la ruinant. Et de fait, il fut à

vn point pres de perdrel'Estat , si le Consul
Ciceron n'y eut mis remede.

La presence des Princes est vn Soleil bien
clair ou bien fort contre les broüillars de *Se-
ianus* , il a beau espoissir les nuées impures,
d'orgueil, d'auarice, d'iniustice, d'ambition,
de tyrannie ; Les rayons de ces Soleils diffi-
pent tout, les fondent en eauë liquide, leur
font rëdre gorge : C'est ce que *seianus* craint.
C'est la meditatioñ qui l'ocupe: c'est en vn mot
où tous les ressorts de son esprit sont bandez,
Et vous n'en ferez point Iustice à la France,
qui la vous demande avec larmes de sang ?

Parthenius fut lapidé pour auoir conseillé
le Roy Theodebert de charger ses subjects de
nouveaux subsides.

Georges Prescheron fut executé à mort
pour mesme subject , & fit perdre Henry de
Seude, duquel il estoit gouverneur.

Seianus faict pis que cela, & toutesfois il vit
encores : n'en ferez vous point Iustice, SIRE,
pour le moins souffrez que nous la facions
faire. Si *Commeune* a peu faire chastier Theo-
dore , son fauory, pour anoir destourné vn
bœuf seulement, qui appartenoit à vn sien
pauvre subject : Que ferez vous à *sejanus*, qui
vous volle, & vostre peuple aussi ?

Vostre Conseil n'est plus qu'une Cohue,
pire cent fois que le Chastelet de Paris : tou-
tes choses telles quelles soiēt y sont éuouquées
pour de l'argent : l'expedition ne s'y fait qu'à
force de pistoles : car pour la Iustice, on ne l'y

ognoist point. Cent escus fōnt bailler au-
iourd'huy vn Arrest, & cent pistoles le font
reuoquer le lendemain. Il se trouuera tel
qu'apres y auoir eu dix-neuf Arrests portans
renuoy à vne Cour souueraine, sa partie a fait
tout reuoquer par apres sur vne simple re-
queste: & moyennant cinq cens escus, a fait
retenir le procez au Conseil, l'y a faict iuger,
& a eu Arrest avec despens contre sa partie.

Il s'en est veu mesme quelques vns contre
lesquels a esté necessaire que le grand Con-
seil, indigné d'une chicannerie si estrange,
ayt procedé par deffenses, sur peine de la vie,
de se pouruoir plus en vostre dict Conseil. Et
a esté verifié que pour vn affaire de dix escus,
vn procez ya esté traité six ans entiers.

Cela ne suffit point. On y falsifie les Arrests,
on les antidate, on les tronque, on les re-
broüille, on les change; bref ils sont faicts à
la fantaisie de ceux qui donnent le plus à *Se-
ianus*

Tous crimes, toutes recherches, toutes
maluersatiōs sont abolies par Arrest, moyen-
nant del'argent.

Et outre, que pendant l'assemblée dernière
des Estats tenus en ceste ville, autres offres
estans faictes beaucoup plus aduantageuses
pour le public, par lesquels estoit offert payer
aux bourgeois les quatre quartiers des rentes
constituées, au lieu qu'il ne leur en est payé
que trois; cela auroit encores esté rejetté par
Sejanus, sous ombre des pistoles touchées: &
l'acte

l'acte desdictes offres, avec les sommations & protestations, en sera representé au temps que la pierre en deura estre remuée.

Du Monceau, vostre Procureur general en la Cour des Aydes, en a faict la preuue, puis que pour se garantir du naufrage où les concussions l'auoient jettées, il a mis és mains de *Sejanus* la procuration *ad resignandum* de son office, pour en disposer à son profit. Bref les Arrests s'y vendent à pistoles; Thomassin, Chalopin, Henyn, Mauroy, L'Huillier & Berruyer en sont les proxenetes & colporteurs: il faict des perties casuelles de la receptiō des Aduocats au Conseil: ce n'est plus que brigandages: les promesses de don faict au Cōmandeur son frere par Rousselet, dont le Parlement de Paris est saisy, en sont les tesmoins: Le mesme est de celle de Guibert, & Blanchard, dont l'histoire est pitoyable, & à qui on a faict porter la peine du crime d'autrui: Mais aussi pour recompense, leur retablissement est asseuré, la confiscatiō remise, & gratification promise au retour du voyage de Guyenne.

Voyez l'industrie de *Seianus*, pour s'excuser & se couvrir, il fait chastier d'une main: mais pour garder qu'on ne le descouure, il recompense de l'autre; & cela fait-il depuis la plainte & les Remonstrances du Parlement, afin que ceux qui ont traitté avec luy pour semblables affaires, se contiennent en silence & en

respect.

Venons aux sceaux, & à ce que vostre Parlement vous en a dict: Adjouſtons que tout s'y faiet pour del'argent, par l'entremie de deux orgueilleux coquins, Regnoart, & Cusſon: les crimes meſmes de leze Majeſté y ſont remis, les éuocations, les remiſſions, les abolitions, les rappels des galleres, les reſpits, les leuées de deniers, les edicts des creatiōs d'office, tout y paſſe; *ſejanus* caſſe & reſtablit qui bon luy ſemble, fait reuiure les offices ſupprimez, eſtablit des officiers aux Chancelleries; leur attribue des droicts à la foule du peuple, augmente la taxe des lettres, cree des Nobles en France, en prend les deniers & finances.

Il fait par tout du ſouuerain, iuſques meſmes à prendre vingt ſols ſur chaque le-tre de maiſtriſe, ſous pretexte du controolle dudit Regnoart.

Mais qu'eſt-ce que *ſejanus* ne fait point aux Finances? A ce petit Conſeil qu'il nomme direction priuee? Il n'y a affaire qui ſ'y traite dont il ne face argent: Tous les partis, & vos fermes luy ſōt tributaires: Il n'y a partiſan ny fermier qui ne luy doie hommage, le diſ vne rente annuelle, & ſon droit d'entree. Ceux meſme qui pourſuiuent quelque rembourſement ou payement des debtes ſont contraints d'en traiter & compoſer: Touſiours rabbais & deſdommagemens en voye: Touſiours folles encheres chez luy: Touſiours

partisans à ses trouffes pour auoir des diminutions de charges , ou bien des augmentations de nouueaux droicts , & des plus longues annees iamais rien à vostre profit.

Cæsar en son premier Consulat feit rabaisser les encheres des fermiers apres auoir eu les mains graissees. *Metellus* Tribun du peuple ostale peage d'Italie moyennant de l'argent qu'on luy bailla : *Pericles* feit distribution en Athenes de quelques deniers qui reuenoien: de bon des finances en faueur de ses fauoriz
SIRE, voila le train de *Sejanus*.

Et qui ne sçait ce qu'il a fait depuis fort peu de iours sur le party de feu Charles Paulet sous le nom d'un nommé Desplaiz, à la poursuite de la Mareschalle d'Ancre, & de Dollé qui y prend part, & si est associé sous le nom d'un de ses Clercs : Ce qu'il minutte sous la ferme de Lyon en faueur de Bullion: Et le bon est que ces beaux Conseillers partisans d'affaires sont tousiours Cômises & Deputez pour les executer. Tellement qu'il ne faut plus se-stonner de sa bonne Iustice.

Qui ne sçait encore un coup ce qu'il a faict sur les confirmations des offices, ayant pour en profiter, faict falsifier le roolle des taxes, surchargé les officiers des prouinces de plus que n'auoient esté arrestez, & dout l'on a compté, les ayant de plus obligé à vne prouision de six escus chacun, & à des frais qui ne furent iamais veuz, ny deub; combien de cō-

cussions, combien d'oppressions a-il fauorifées & auctorifées par lettres du grand sceau, & Arrests du Conseil pour cét effect: Et qui ne sçait l'histoire des Quatreuaux, & la Iustice que le Parlement de Bretagne a esté contraint d'en faire.

Digne & celebre Senat, qui a tesmoigné à la posterité que le seul seruice du Roy, & le zele de la Iustice est son but, & son phare, sans apprehender ny craindre les fulminations de *seianus*, ses menées, ny mesmes ses recompenses. Digne encore vn coup que la posterité en sçache l'histoire; & sur vne table d'eternité, l'intégrité de ce Senat & de ses deputez soit grauée en lettre d'or.

Quatreuaux donc, vollant & iauageant la Bretagne sur le sujet des confirmations, les plaintes en furent si grandes que vostre Procureur General en ayant fait informer, le Parlement auroit condamné ce concussionnaire en l'amende honorable, la corde au col, & estre fustigé & banny: Cet Arrest est executé, *seianus* qui en a la nouuelle, & qui par ce moyen se veoid frustré du profit qu'il en esperoit, depesche incontinent vn adiournement personnel contre ce Parlement; Le sieur de Lestumieres President, assisté de quatre Conseillers dudit Parlement, vient se presenter, demande d'estre oy; *seianus* qui sçait que les memoires de ces Deputez sont remplis de ses faits & gestes, & que la charge qu'ils ont de

la Cour est de le dénoncer , leur traïsne ceste audience à longs iours , & en fin la leur refuse ; Et pour leur faire trouuer doux ce refus leur donne vn Arrest pour retourner continuer leurs charges ; Et les ayant mandez chez luy , leur feit vne grande & belle harangue remplie d'artifice & d'hipocrisie , la fin de laquelle est, qn'il offre à ce President deux mil liures de pensiõ par an sur l'Espargne, & douze cens liures à chacun des Conseillers qui l'assistent, leur demande si pour leur particulier ils ont quelques affaires près du Roy , ou quelque procez au Conseil , & leur promet toute sorte de contentement : Voyez , cherchez , demandez (leur dit-il) ie vous feray bailler tout ce que desirerez. Monsieur, respondent ces Deputez, Nous sommes venus icy pour rendre compte de nos actions , & y seruir le Roy , Non pour auoir recompences ny gratifications , ne pour nos affaires particulieres : Nous vous remercions de vostre bonne volonté , n'estimant point que quant à present le Roy soit en aage de faire du bien & des personnes qu'il ne cognoist point , ny leurs seruices : Mais quand il sera plus grand, & que Dieu nous aura fait la grace que sa Majesté pourra recognoistre nos seruices, Nous ne refuserons point le bien qu'elle aura agreable de nous faire.

Grande & graue responce, digne certes d'vn President de Cour souueraine: *Sejanus* pensoit

corrompre ces Senateurs, & il les trouue incorruptibles : ils leur offre de l'argent, ils le mesprisent, & se mocquent de luy : en vn bon mor, ce ne sont point des petits *Bullion & Dollé* : ce ne sont point de chetifs Conseillers d'Estat, & Intendants des Finances, ny des Malotrus Maistres des Requestes, ou pensionnaires à mil francs. Non, non, *Sejanus*, ce sont de bons François, & bons luges : ce sont de bons & fideles seruiteurs du Roy, qui ont porté leurs vies & leurs fortunes & de leurs amys aussi, au secours du feu Roy deuant Amies, lors que la France estoit en sa crise : Ce sont gens en effect plus dignes de vostre charge que vous.

Qu'on n'entre donc plus en admiration des maisōs qu'il bastit, & qu'il achete tous les iours, s'il possede, & les siens, toutes les principales & plus importantes charges : Tout passe par ses mains, tout est faict par luy. Et afin que vostre Majesté sçache que ce ne sont point calomnies, mais veritez essentielles & subsistantes, quand elle aura eu agreable de pouruoir sur les plaines du Parlement, & permettre d'en estre informé, on les verifera sur peine de la vie.

O que celuy est digne de loüange immortelle qui premier a mis au iour la verité cachée dans les puits de Democrite, c'est à dire ceste confusion, qui vray Prophete nous a denoncé les malheurs que nous voyons à present en l'Estat, qui en vray & fidel François en a baillé les aduis & les remedes dès l'assemblée des Estats. Mais nous

auons mieux aymé le perdre, & nous perdre, que desplaire à *Sejanus*, & seruir nostre Roy. Ce n'est plus le siecle de recôpense, ny d'honneur. Nous mesprisons ce qu'il faudroit cherir par deuoir, & ce que nos peres auroient honorez & recherché dans les coings les plus esloignez de la terre, & à l'imitation du pourceau d'Epicure, nous ayons mieux crouppir dans la boüe de la confusion, & du desordre, qu'auoir la gloire de bien seruir, & de bien faire, *Sejanus* le veoid bien. Sire, il le sçait bien: c'est pourquoy il y continuë: *Feu Monseigneur le Comte de Soissons* l'auoit menacé assez souuent de luy faire faire son procez: & en presence de la Royne vostre mere, luy auoit reproché ses volleries & sa tyrannie. Mais si pour les malheurs de la France ce grand Prince est mort, ses memoires ne sont point perdus pour cela, ny les resmoins desbauchez de vostre seruice: dictes, & vous serez obey.

Memorable encore, & digne que la posterité soit aduertie de ce qui se passa entre la Royne & ce grand Prince de France, sur le subiect de *Sejanus*, en Aoust 612. Ce Prince prenant congé de sa Majesté pour aller à Roüen, fut prié par elle d'embrasser *Sejanus*, & le tenir pour son seruiteur. Madame, repart ce Prince, le bié de vostre seruice, ny celui du Roy, ne demadent pas cela: Car si *Sejanus* estoit mon amy, qui vous diroit que le Comte de Soissons est vn broüillon, vn ambitieux, qui veut tout faire, & auoir tout? & si i'estois le sien, qui vous diroit aussi que *Sejanus*

est vn meschâr, & vn voleur, vn concussiõnaire, & vn traistre ? personne ne l'oseroit dire. Et le Comte vous dit, que pour le bien de vostre seruice, il faut faire pendre *Sejanus*. Digne Prince, de qui la gloire & le nom ne mourront iamais en l'ame des bons & fidels François.

On nous menace de la retraicte de *Sejanus* à Rome, avec vn Chapeau rouge. Il faut, il faut qu'il se purge, & qu'il vous rende, & au peuple ce qu'il a vollé, auparauât que d'estre admis à ce saint & sacré College: si ce n'est que pour auoir maintenu Rome contre son Roy, il merite vne abolition entiere, sans recherche, à cause de son nouuel serment.

C'est pourquoy il eslongne Monseigneur le Prince, & les autres Princes, Ducs & Pairs qui sont avec luy: les veut faire assassiner, les veut declarer criminels, les veut rendre odieux à vostre Majesté, & au peuple, deffend aux villes de leur donner entree, ny passages, escrit aux parlemens des calomnies, au lieu de la verité de leurs actions. & leur feroit (s'il pouuoit) de mesme qu'il a fait audict sieur Comte de Soissons: c'est à dire, qu'il se defferoit d'eux. Et ne trouuerons nous point en France quelque *Florus* ou *Sayonir* pour resister aux oppressions que les François souffrent.

Les assassins que Conchine commande sont autorisez de *Sejanus*: point de Iustice à *Riberpré*, point à la vesve *Prouuille*, point à Mõsieur le Duc de Longueuille; ensemble point en fin à Monseigneur le Prince.

Les Princes sont plus mal traittez en France, que n'a esté à Rome *Germanicus*, sous *Tibere*. Les conseils de *Sejanus* de *Dollé*, & *Bullion* sont suivis, quand ils rendēt à l'extirpatiō de la France, à la ruine de la Justice, & de tout l'estat, ou à l'advancement de *Conchine*.

Les Sorciers, les Magiciens, les Juifs, & les Anabaptistes sont establis dans vostre Louvre; ils y exercent ouvertement leurs actes diaboliques, & ne s'en cachent point devant les Princesses de vostre sang, & grâdes Dames de France: On en fait venir de Florence, qui sont aduoiez par la Maréschalle: On ne croit, on ne cognoist tantost plus Dieu en vostre Cour: Dans vostre chambre *Conchine* prend à la gorge les Prestres qui detestent ces abominations, & en presence de la Roynie, les veut estrangler. En vn mot, *Sire*, vostre Couronne est departie entre *Sejanus* & *Conchine*: les Princes de vostre sang, les Archeuesques de vostre Royaume seront tantost tous Menuisiers, ou voleurs de robbes de chambre: les lauandieres de *Fleurace* seront bien tost Princesses. Vostre Majesté, *Sire*, la Roynie vostre Mere, Montaigneur vostre frere, Mesdames vos sœurs, & messeigneurs les Princes ne sont plus comptez en France.

Les Grands leur obeissent, & les adorent, les fils des Roys (tant ils sont lasches) en recherchèt l'alliance, & s'en rendēt les estaffiers. Vne troupe de coyons de mil francs les suivent, à nos despens, & du peuple. Ils gourmandent le peuple, possèdent toutes les bonnes villes, les tresors, les

benefices : toutes les charges du Royaume, & de vostre maison foulent aux pieds la Iustice, intimident & menacēt la Royne, iusques à luy faire jeter des larmes ; rauissent à Madame vostre sœur les bagues que la Royne Marguerite luy auoit laissées par testamēt. Vous le souffrez, sans ozer mot dire : *Sejanus* l'auctorise. Et qu'estes vous après cela ? quelle part auez vous en ce Royaume ? On se contente d'vser & abuser de vostre nom, pour couvrir tant de crimes énormes : & les mariages d'Espagne sont faicts plus pour leurs seuretez, que pour le bien de vostre seruice.

La force de l'Estat n'est plus en vostre disposition : vos Finances & vos canons sont es mains de *Sejanus* : La cauallerie & infanterie Françoisse sous l'ordonnance & contrerolle de son fils : vos places fortes ou ruinées, ou cōsignées entre les mains des estrangers, & des assassins du feu Roy. Les Princes esloignez, mal traitez, & courus : la Iustice souveraine mesprisée, & foulée : la Noblesse offensée : le peuple impuissant & irrité : les villes mescontātes & mutinées : le Clergé ennemy ouuert de l'auctorité des Roys, & peu soucieux de la conseruation de leur sacrée Personne : les charges militaires, celles de iudicature, & des finances vendues & rauies à l'honneur, à la vertu, au seruice, au merite, & à la capacité. Nos voisins, amis, & alliez fort mal affectionnez : Nostre ennemy est dans vostre Royaume. Voyez, *Sire*, l'estat en quoy vous estes, le peu de moyens que vous auez d'y resister, & le peu

cipice dans lequel *Sejanus* vous porte: car il est seul cause de nostre mal. Helas! que nous auons bien à apprehender le temps d'Achæus Roy des Lydiens, celuy de Denys le ieune, veoir celuy de Theodoric Roy de France. Mais bon Dieu destourne ce mal-heur. Vn grand Prince de l'antiquité demandant à vn Philosophe de son siecle le moyen de remettre vn estat qui estoit sur le panchant de sa ruine, apprint que c'estoit en faisant Iustice, recompensant la vertu, & chastiant le vice.

Toute la France, *Sire*, vous represente les maux que *Sejanus* a faict en vostre Estat, vous en demande Iustice: & vous auez veu que l'Empire de Rome n'a peu éuiter sa cheutte que par la mort de *Sejanus* Romain. Que vostre Majesté dōc face Iustice, & ne souffre point l'embrasement du plus beau Royaume du monde, pour maintenir contre les loix de l'Estat, la tyrannie que *Sejanus* & les autres mauuais François exercent sur le peuple.

Et afin, *Sire*, de vous faire entendre qu'il ne peut entrer en la creance de tous vos subjects, que vouliez mettre en oubly la mort du feu Roy vostre pere: mais au contraire, que vous voulez sensiblement rechercher & exterminer ceux qui en seront trouuez coupables, comme sceut fort bien faire le Roy Louys troisieme, 4^e celuy qui auoit fait mourir Charles le simple son pere. Le discours de ceste mort, & la punition de l'assassinateur est icy veritablement representé, pour faire voir à vostre Majesté le ressentiment

Qu'en eust ledict Roy Louys, & l'astuce dont il
 vsa pour l'attraper. Vous sçavez donc, *Sire*, s'il
 vous plaist, Que apres auoir ledit Loys longue-
 ment dissimulé & tenu ceste mort à dessein, il fit
 conuoquer à vne solempnelle feste en la ville de
 Laon plusieurs Princes, & grands Seigneurs, du
 nôbre desquels estoit le meutrier, appellé Com-
 te Hebert: & quand ils furent tous assemblez,
 vint deuant sa Majesté vn Courier, lequel s'a-
 genouilla & prosterna à ses pieds, feignant venir
 d'Angleterre, le salua, & luy presenta vne lettre,
 qu'il dit estre de la part d'Emond Roy d'Angle-
 terre. Surquoy le Roy qui cognoissoit ce Cour-
 rier appellé Gallopin, le receut assez familiere-
 ment, & prit ladicte lettre, laquelle leuë tout
 bas par son Chancelier, & recogneu que pour
 s'estre pris à sous-rire oyant ladicte lecture, les-
 dits Princes & Seigneurs tesmoignoient desirer
 en sçauoir le sujet. Il leur dist: C'est mon Cou-
 sin le Roy d'Angleterre qui me mande qu'il est
 aduenü en son Royaume qu'un certain rustic a
 femons son Seigneur de qui il estoit subject, à al-
 ler disner en sa maison, & quand il y a esté, l'a
 pris & détenu, & puis apres l'a étranglé & fait
 mourir: & me prie mondit Cousin luy faire sça-
 uoir surce vos opinions, & luy conseiller ce qui
 en doit estre fait. A quoy fut respondü par Thi-
 bault Comte de Blois qui estoit le plus ancien &
 réputé fort homme de bien, que ledit rustic de-
 uoit être pendu & étranglé ignominieusement,
 & ses biens acquis & confisquez au Seigneur.
 Opinion qui eüst suivie de tous les autres Prin-

ces & Seigneurs y assistans, & notamment par
 ledit Comte Hebert qui ne se doutoit de rien,
 ledit Roy Loys le regardant luy dit, Je te juge &
 condâne par ta bouche mesme, à pareil & sem-
 blable supplice. Car tu sçais, Hebert, que tu in-
 vitas feu Monseigneur mon Pere, que Dieu ab-
 solue, par beau semblant d'amitié, & faisant mi-
 ne de le vouloir festoyer en ta maison : & quand
 il y fut, tu le retins & fis mourir traistrement,
 Et parce, ie te condamne a estre pendu & étran-
 glé, & tes biens acquis & confisquez. Et ainsi fut
 ledit Hebert pris & mené à l'instant sur vn hault
 Mont proche dudit Laon, lequel à cause de luy,
 & pour marque de ce, est encores appellé le
 Mont Hebert.

*Audiat hæc Iupiter qui crimina fulmine
 frangit.*



